

आकाशवाणीखबरां

1. प्रधानमंत्री नरेंद्र मोदी होरें अज्ज अरुणाचल प्रदेश च 5100 करोड़ रपे कोला मते दिएं परियोजनाएं दी शुरूआत कीती, आखेआ जे अरुणाचल छड़ी चढदे सूरज दी धरती गै नेही सगुआं देशभक्ति गी जन्म देने आहली थाहर बी ऐ।
2. प्रधानमंत्री नरेंद्र मोदी होरें अज्ज नरातें दी ममारकबाद दिंदे होई आखेआ जे एहकड़ा नराता उत्सव मता खास ऐ की जे अज्ज मुल्लवै च जीएसटी बचत उत्सव बी शुरू होआ ऐ।
3. सूचना ते प्रसारण मंत्री अश्विनी वैष्णव होरें आखेआ ऐ जे जीएसटी दिएं दरें च कटौती करियै मोदी सरकार नै इक ऐतिहासिक फैसला लैता ऐ।
4. नरातें दे पैहले रोज अज्ज सरकारै 25 लक्ख नमें मुफ्त पी.एम उज्जवला गैस कनेक्शन उपलब्ध कराने दा फैसला लैता ऐ।
5. केंद्री गृह मंत्रालय नै नेशनल सोशलिस्ट काउंसल आफ नागालैंड खापलांग ते एहदे नै जुड़े दे सब्बने धडत्रें ते शाखाएं गी गैर कनूनी संगठन घोषित करी दित्ता ऐ।

<><><><><>

PM Arunachal Pradesh

प्रधानमंत्री नरेंद्र मोदी होरें अज्ज अरुणाचल प्रदेश च 5 ज्हार 100 करोड़ रपे कोला मती लागत आहिलें कई बुनियादी ढांचा परियोजनाएं दी शुरूआत कीती जिंदे च उर्जा ते क्षेत्रीय विकास च राज्य दी बढदी भूमिका पर चेचा ध्यान दित्ता गेआ ऐ। प्रधानमंत्री होरें शियोनी जिले च 2 प्रमुख पनबिजली परियोजनाएं ते तवांग च इक कन्वेंशन सेंटर दी बुनियाद दी वर्चुअल ढंगै नै रक्खी। एहदे अलावा उनें सड़क राबता, सेहत सेवा ते अगग ते आपात खतरे कोला सुरक्षा सरबन्धी क्षेत्रें च 1 ज्हार 290 करोड़ रपे कोला मती लागत आहिलें परियोजनाएं दी शुरूआत बी कीती। मगरा ईटानगर दे इंदिरा गांधी पार्क च इक जनसभा गी संबोधन करदे होई मोदी होरें आखेआ कि अरुणाचल प्रदेश दी धरती ना छड़ी चढदे सूरज दी धरती ऐ, सगुआं देशभक्ति गी जन्म देने आहली भूमि बी ऐ। उनें आखेआ कि जिस चाल्ली तरंगे दा पैहला रंग केसरिया ऐ, उसै चाल्ली अरुणाचल प्रदेश दा बी पैहला रंग केसरिया गै ऐ कीजे इत्थै रौहने आहला हर माहनू दलेरी ते सादगी दी जींदी जागदी मसाल ऐ। मोदी होरें आखेआ जे एनडीए सरकार दे कार्यकाल दरान अजें तोड़ी बक्ख-बक्ख केंद्री मंत्रिण 800 कोला मती बारी पूर्वोत्तर दा दौरा कीता ऐ ते इस इलाके दे दूर-दरेडे इलाकें तगर पुज्जने दी कोशश कीती ऐ।

<><><><><>

PM Greetings

मुख्य भरै च अज्ज शारदीय नराते शुरू होई गेन। राष्ट्रपति, उपराष्ट्रपति, प्रधानमंत्री ते होर कई समाजी, धार्मिक ते सियासी लीडरें लोकें गी इस मौके ममारकबाद दिंदे होई सब्बने दी सलामती, तरक्की ते खुशहाली दी कामना कीती ऐ। प्रधानमंत्री नरेंद्र मोदी होरें इस मौके अपने ममारकी स्नेह च आखेआ ऐ जे एहकड़े नराते मते खास ते मती खुशी देने आहले न कीजे अज्जे दे रोज जीएसटी दियां नमियां दरां लागू होआ करदियां न जेदे नै लोकें दे पैहले दी बचत होग ते ओहू जीएसटी बचत उत्सव दा हिस्सा बनडन।

<><><><><>

VP-PM Speeches

उपराष्ट्रपति सी.पी राधाकृष्णन होरें अज्ज नमी दिल्ली च प्रकाशन मैहकमे आसेआ शायी ते प्रधानमंत्री नरेंद्र मोदी हुंदे पर आधारित चार संकलित कताबें "सबका साथ, सबका विका, सबका विश्वास, सबका प्रयास" दा विमोचन

कीता। इस मौके पर उन्हें आखेआ कि प्रधानमंत्री मोदी होर मुल्खे दे अंदर ते मुल्खे थमां बाहर केई लोकं लेई प्रेरणा न। उन्हें आखेआ जे नरेंद्र मोदी आम आदमी दे प्रतिनिधि थमां इक सच्चे जन नेता दे रूपै च उभरे न, जिंदे पक्के धेइए ते आत्मविश्वास नै एहू दस्सी दित्ता ऐ जे नामुमकिन गी किस चाल्ली मुमकिन बनाया जाई सकदा ऐं उन्हें आखेआ कि जिसलै विजन कुसै मेद दे लुब लालच दे मनुक्ख मात्र दी सेवा करने दी इच्छेआ शक्ति मनै च होंदी ऐ तां ते एहू गल्ल नरेंद्र मोदी होरें दुनिया दे सामने साबत करी दस्सी ऐ। उपराश्ट्रपति होरें आखेआ कि प्रधानमंत्री हुंदे दुए कार्जकाल दे चौथे ते 5में बरे दे तालमे भाशणें आहिलयां एहू कताबां कई मायने च सुशासन लेई उंदी सोच ते नजरिए गी दर्शादियां न। उन्हें इस गल्लै पर बी लोहू पाई जे मोदी हुंदी अगुवाई च भारत दुनिया दा सब्बने शा बड्डा खाद्य सुरक्षा कार्जक्रम चला करदा ऐ जेदे तैहत 80 करोड़ कोला मते लोकें गी मुफ्त काअन्नदाना उपलब्ध करोआया जा करदा ऐ। उन्हें इब्बी गलाया जे मुल्ख भरै च 54 करोड़ जन धन खाते खोले गन ते 13 करोड़ शौचालयें दा निर्माण बी कीता गेआ ऐ।

<><><><><><>

I&B Minister GST

सूचना ते प्रसारण मंत्री अश्विनी वैशणव होरें आखेआ ऐ कि प्रधानमंत्री नरेंद्र मोदी होरें माल समेयान ते सेवाएं सरबन्धी टैक्स जीएसटी दिएं दरें च कटौती करियै इक ऐतिहासिक फैसला लैता ऐ जेदा लाहू हर आम आदमी गी थोना अज्जै थमां शुरू होई गेआ ऐ। उन्हें आखेआ जे एहूदे नै हर परिवार गी पैहे जोड़ने च मदद थोग। अज्ज नमीं दिल्ली च संवाददाताएं कन्नै गल्लबात दरान वैशणव होरें आखेआ जे लोकें गी अपने रोजमर्रा दे जीवनै च मुल्खे अंदर तैयार माल-समेयान ते जरूरत दी हर चीज खरीदनी लोड़चदी तां जे अर्थ बवस्था गी मजबूती थोऐ ते देश दा हर नागरिक खुशहाल बनी सकै।

<><><><><><>

PM-Ujwala

नरातें दे पैहले रोज सरकारै 25 लक्ख नमें मुफ्त पी.एम उज्जवला गैस कनेक्शन उपलब्ध कराने दा फैसला लैता ऐ। प्रधानमंत्री मोदी होरें इस मौके अपने संबोधनै च आखेआ जे उज्जवला परिवार च शामिल होने आहिलिएं सब्बने माताएं ते भैहने दा सुआगत ऐ। अपने स्नेए च मोदी होरें आखेआ जे एहू इक्क लौहकी जनेई कोश्ट ऐ अपने देश दिएं मावरीं ते भैहने दे जीवन च सुधार ते सखाल आहने दी।

<><><><><><>

GST-Reforms

वस्तु ते सेवा कर दियां नमियां दरां अज्जै थमां लागू होई गेइयां न। एहूदे तैहत 12 ते 28 फीसद दे कर दी स्लैब गी हटाई दित्ता गेआ ते एहूदी थाहर हुन 5 ते 18 फीसद दी स्लैब होग। Luxury ते किश होर उत्पादें गी छोड़ियै सारियां चीजां ते सेवा इनें दौनें स्लैबें च आई गेइयां न। नमीं दरें दे लागू होने दे कन्नै लोक हुन घट्ट कीमतें पर अपनी पसिंद दी चीजां खरीदी सकडन ते देश आत्मनिर्भर भारत की दिशा च अगगे बदोग। जम्मू खित्ते च इसी लेइयै खासा उत्साह दिक्खेआ जा'रदा ऐ, सब्बै वर्गे दे लोकें नमें कर सुधारें दी सराहना करदे होई आखेआ जे सरकार दा एहू कदम उन्दे जीवन च बड्डा बदलाव लेआग की जे एहूदे नै रोजमर्रा दी जिंदगी च इस्तेमाल होने आहिलियां चीजां सस्तियां होडन।

<><><><><><>

Israel-Lebnon

दक्खनी लेबनान दे बिंट जेबिल शैहरै च कल होए दे इज्राइल दे इक ड्रोन हमले च त्रै बच्चें सने 5 लोक मारे गे न। लेबनान दी अधिकारिक समाचार एजेंसी मूजब हमले च इक मोटरसाइकल ते इक गड्डी गी नशाना बनाया गेआ जेदे च 2 होर लोक बी घायल होई गे। इज्राइल नै दस्सेआ ऐ जे हमले च हिज्बुल गुट दा इक मिम्बर मारेआ गेआ ऐ ते 2 दुए घायल होए न।

<><><><><><>

Isreal Ghaza

इजराईल दे हमले च कल गाजा च 31 फिलिस्तिनियों की मौत होई गई ते केंई ईमारतां बी तबाह होई गेइयां ना। गाजा दे सेहत अधिकारियों दस्सेया ऐ जे इजराईल टैंक घनी आबादी आहले इलाकें च अगड़े बधी आए देना। इजराईल नै आखेया ऐ जे उन्नै पिच्छले किश दिनें दौरान गाजा दे शैहरी इलाकें च आतंकवादियों दे सफाए ते थेहारें दा पता लाने दा अभियान तेज करी दिता ऐ। एह कारवाई इस हफ्ते संयुक्त राष्ट्र महासभा की सलाना बैठक कोला पैहले इजराईल दे किश पच्छमी सहयोगियों आसेया फिलिस्तीन की राष्ट्र दे रुपे च औपचारिक मान्यता देने की घोषणा दे बाद कीती गई ऐ।

<><><><><><>

Israel PM -Palestinian

इजराईल दे प्रधानमंत्री बेंजामिन नेतन्याहू होरें फिलिस्तीन की इक राष्ट्र दे रुपे च मान्यता देने आस्तै ब्रिटेन-कनाडा ते आस्ट्रेलिया की चेतावनी दिती ऐ। इजराईल नै इ'नें त्रौनें मुलखें पर आतंकवाद लेई फिलिस्तीन की ईनाम देने दा आरोप लाया। नेतन्याहू होरें इक ब्यान च आया आखेया जे जॉर्डन दरया दे पश्चिमी किनारे पर कोई फिलिस्तीनी राष्ट्र नैई होग। इस ब्यान कन्नै इजराईल सरकार दे युद्ध लक्ष ते गाजा पट्टी च लगाता बम्बारी की स्थिति स्पष्ट हुंदी ऐ। फिलिस्तीन की अलग राष्ट्र दे रुपे च मान्यता दिते जाने दा विरोध दोहरांदे होई नेतन्याहू होरें पश्चिमी तट पर इजराईली बस्तियों दा विस्तार जारी रखने दा संकल्प लैता। उ'नें आखेया जे केंई बरे दा ओह आतंकी राज्य की स्थापना दा विरोध करदे आ'रदे ना।

<><><><><><>

Pak-Airstrike

पाकिस्तान ब्हाई फौज नै खैबर पखतूनख्वा प्रांतै च ब्हाई हमले कीते ना। इनें हमलें च महिलाएं ते न्याणे समेत घटोघट्ट 30 लोकें दे मारे जाने की खबर ऐ। पाकिस्तानी लड़ाकू जहाज जे.एफ.17 नै जंदी अद्दी राती दे बाद कोई दो बजे तिराह घाटी च स्थित मत्रो दारा ग्रां च 8 एल.एस 6 बम्ब सुट्टे जेदे कारण इनें लोकें की मौत होई गई। मीडिया च जारी फोटुएं ते वीडियो च हमले आहली थाहरै पर कई लोक जखमी हालत च रौंदे करलांदे दिक्खे जा करदे हे ते केइए दियां लोथा चबक्खिया पेदियां हियां। अंतरराष्ट्री सतह दे कई संगठनें जेडे मनुक्खी अधिकारें की राखी लेई कम्म करदे न, नै मंग कीती ऐ जे इनें हमलें की जांच कीती जा ते आम नागरिकें की सुरक्षा ते कुसै बी चाल्ली की उल्लंघना लेई जवाबदेही तैय कीती जा।

<><><><><><>

Nagaland-MHA

केंद्री गृह मंत्रालय नै नागा संगठन नेशनल सोशलिस्ट काउंसिल ऑफ नागालैंड खापलांग की ओहदे सबबने धड़ें ते शाखाएं समेत औंदी 28 सितंबर थमां 5 बरे लेई गैर कनूनी संगठन घोशत करी दिता ऐ। अज्ज जारी इक अधिसूचना च आखेआ गेआ ऐ इस संगठन दे कई गैर कनूनी गतिविधिएं च शामिल होने की ध्यानै च रखदे होई एह फैसला लैता गेआ ऐ। एह फैसला गैर कनूनी गतिविधिएं पर रोक लाने सरबन्धी 1967 आहले कनून की धारा 3 उपधारा 3 दिएं बवस्थाएं तैहत हासल अधिकार दा इस्तेमाल करदे होई लैता गेआ ऐ।

<><><><><><>

Sewa Parv Smart City

मुख्य भरै च मनार्इ जा'रदी "सेवा पर्व" पैहलकदमी तैहत अज्ज अस तुंदे आस्तै लेइये आए आं जे किस चाल्ली प्रधानमंत्री नरेंद्र मोदी हुंदी अगुवाई आहली सरकार नै स्मार्ट सिटी मिशन राहें शैहरी इलाकें की बदला'रदी ऐ ते लोकें दे जीवन च बेहतरी आहना'रदी ऐ। स्मार्ट सिटी मिशन भारत दे शैहरी इलाकें की नमें सिरेआ आकार देआ'रदा ऐ, आसैं-मेदें की हकीकत च तब्दील करा'रदा ऐ। प्रधानमंत्री हुंदे आसेआ जून 2015 च शुरू कीती गेदी इस पैहलकदमी दा मकसद शैहरें च टिकाउ हल दे राहें जीवन जीने दे म्यार च सुधार आहनना ऐ। पिछले इक

दाहके च इस मिशन नै महत्वपूर्ण प्रगति हासल कीती ऐ। 8 ज्हार कोला मती परियोजनाएं चा तकरीबन 94 फीसदी परियोजनाएं दा कम्म हून पूरा होई गेदा ऐ।

<><><><><><>

Korea-Open Badminton

कोरिया ओपन बैडमिंटन टूर्नामेंट कल्लै थमां शुरू होआ'रदी ऐ। टूर्नामेंट च लक्ष्य सेन, पी.वी सिंधु, के श्रीकांत ते डबल्स च सात्विक ते चिराग जनेए कई प्रमुख भारती खडारी हिस्सा नेई ले करदे ना। मर्दे दे सिंगल्स च आयुष शेटी, एच.एस प्रणय ते किरण जार्ज चुनौती पेश करंगन। तरूण मन्नेपल्ली ते मीरबा लुवांग मैसनाम कल पैहले रोज अपने-अपने क्वालीफायर मकाबले खेडगन। महिलाएं दे इक्कले-इक्कले मकाबले च छड़ी अनुपमा उपाध्याय गै अपनी चुनौती पेश करंगन।

<><><><><><>

China-Alert

दक्खनी चीन दे गुआंडा डोंग प्रांते दे 2 शैहरें झुहाई ते जियांगमेन च रागासा तूफान दे चलदे लैवल दो दी इमरजेंसी दी चेतावनी जारी करी दिती गेदी ऐं बडुलै 10 बजे गे लोकें गी मता सतर्क रौहने ते प्रशासन आसेआ दस्सी जाने आहली जरूरी एहतियात बरतने लेई आक्खी दितता गेदा ऐ। कुदरती करोपिएं सरबंधी नियंत्रण आहले मैहकमे दा आखना ऐ जे एहतियात दे तौरा पर इनें इलाकें च आम जनजीवन, कम्मकाज, सार्वजनिक गड्डिएं दी आओजाई ते बवसायिक संचालन दे कन्नोकन्नी स्कूल बी कल मंगलवारें बंद रक्खे जाडन।

<><><><><><>

Prog. Announcement

आकाशवाणी जम्मू दा क्षेत्रीय समाचार एकांश अगली पीढ़ी दे जी.एस.टी. सुधारें मतल्लक विशे पर 15एं मिनटें दी इक बशेश परिचर्चा प्रसारित करा'रदा ऐ। एहू परिचर्चा जंदी 19 सितम्बर गी प्रसारत कीते गेदे बशेश कार्यक्रम दा दुआ भाग ऐ ते एहू जी.एस.टी दी 18 फीसद ते 40 फीसद आहली स्लैब दे अमल च औने सने 28 फीसद जीएसटी स्लैब गी खत्म करी देने उप्पर आधारित होग। कल मंगलवारें 23 सितंबर गी बडुलै 8 बज्जियै 45एं मिनटें पर इस प्रोग्राम दा विशेष प्रसारण होग। इस कार्यक्रमै च साढी परौहिनयां होडन जम्मू-कश्मीर सरकार दे स्टेट टैक्स विभाग दिआं एडीशनल कमिशनर ते जम्मू-कश्मीर प्रशासनिक सेवा दिआं वरिष्ठ अधिकारी श्रीमति नमरिता डोगरा, जेडियां इस विशे पर अपने माहिराना बचार सांझे करडन। इंदे कन्नै गल्लबात मेरे यानि विजय बजाज आसेआ कीती जाहग। सुनदे रवो आकाशवाणी समाचार जम्मू मीडियम वेब 303 मीटर 990 किलोहर्टज पर ते एफ.एम 100.3 मेगाहर्टज पर।

<><><><><><>